

BOSNA I HERCEGOVINA
FEDERACIJA BOSNE I HERCEGOVINE
UNSKO-SANSKI KANTON
GRAD BIHAĆ
GRADONAČELNIK

Broj: 07/2-11- 3544

Bihać, 06.07.2023 .godine

Na osnovu člana 183. stav (2) Poslovnika Gradskog vijeća („Službeni glasnik Grada Bihaća“ broj 3/16, 4/20), a u vezi sa članom 52. stav 1. tačka c. Statuta Grada Bihaća („Službeni glasnik Grada Bihaća“ broj 13/15,13/18 i 12/22) Gradonačelnik u svojstvu predlagača propisa i drugih akata

ODREĐUJE

Izvjestioca mr. sci Alisa Mahmutagić na sjednici Gradskog vijeća i radnim tijelima po prijedlogu tačke dnevnog reda:

Nacrt Odluke o finansiranju troškova prevoza učenika srednjih škola

GRADONAČELNIK
Elvedin Sedić

BOSNA I HERCEGOVINA
FEDERACIJA BOSNE I HERCEGOVINE
UNSKO-SANSKI KANTON
GRAD BIHAĆ
GRADONAČELNIK

Broj:07/2-11-3544

Bihać, 06.07.2023. godine

GRADSKO VIJEĆE BIHAĆ

**Predmet: Nacrt Odluke o finansiranju troškova prevoza
učenika srednjih škola**

Na osnovu člana 52. Statuta Grada Bihaća („Službeni glasnik Grada Bihaća“ br. 13/15, 13/18 i 12/22) i člana 140. Poslovnika Gradskog vijeća Bihać („Službeni glasnik Grada Bihaća“ br. 3/16, 4/20), gradonačelnik, Gradskom vijeću Bihać dostavlja na razmatranje radi prihvatanja uz sljedeće

Obrazloženje

I PRAVNI OSNOV

Pravni osnov za donošenje Odluke o finansiranju troškova prevoza učenika srednjih škola za 2024.godinu sadržan je u:

- članu 12. stav (3) tačka 1) Zakona o lokalnoj samoupravi Unsko-sanskog kantona („Službeni glasnik Unsko-sanskog kantona“ broj 8/11), koji propisuje da: “U vlastite nadležnosti jedinica lokalne samouprave posebno spadaju, između ostalog; ocjenjivanje rada ustanova i kvaliteta usluga u djelatnosti zdravstva, socijalne zaštite, obrazovanja, kulture i sporta te osiguranje finansijskih sredstava za unapređenje njihovog rada i kvaliteta usluga u skladu sa potrebama stanovništva i mogućnostima jedinice lokalne samouprave.”

- u članu 35. tačka c) Statuta Grada Bihaća („Službeni glasnik Grada Bihaća“ broj 13/15, 13/18 i 12/22) koji propisuje da Gradsko vijeće u okviru samoupravnog djelokruga donosi

odluke i druge opće akte kojima uređuje pitanja iz samoupravnog djelokruga Grada i daje njihovo tumačenje, i

- u članu 35. tačka jj) Statuta koji reguliše da Gradsko vijeće u okviru samoupravnog djelokruga ocjenjuje rad ustanova i kvalitet usluga u djelatnosti zdravstva, socijalne zaštite, obrazovanja, kulture i sporta najmanje jednom godišnje, te osigurava finansijska sredstava za unapređenje njihovog rada i kvaliteta usluga u skladu sa potrebama stanovništva i mogućnostima Grada.“

II RAZLOZI ZA DONOŠENJE

Grad Bihać već duži niz godina finansira prevoz određenih kategorija učenika srednjih škola, te je na sjednici Gradskog vijeća od 21.02.2023. godine donesena Odluka o finansiranju troškova prevoza učenika srednjih škola u Gradu Bihaću za 2023. godinu broj:01-11-8 od 21.02.2023. godine, koja se primjenjuje do kraja decembra 2023. godine. Na istoj sjednici donesen je i Zaključak broj 01-11-20 od 21.02.2023. godine kojim je traženo od Službe za opću upravu i društvene djelatnosti da u roku do 90 dana pripremi Nacrt Odluke o sufinansiranju svih đaka putnika s područja grada Bihaća, te da u navedenom roku istraži mogućnosti sufinansiranja ove Odluke od strane viših nivoa vlasti i drugih izvora.

Slijedom navedenog pristupljeno je izradi Nacrta Odluke o finansiranju prevoza učenika srednjih škola za školsku 2023./2024. godinu. U članu 2. Nacrta Odluke predlaže se da se pravo na finansiranje prevoza prizna redovnim učenicima srednjih škola sa prebivalištem u Bihaću koji pohađaju srednju školu na području grada Bihaća, čija je udaljenost od mjesta prebivališta do škole najmanje 5 (pet) kilometara. Finansiranje troškova prevoza u iznosu od 100% od cijene mjesečne karte predlaže se za djecu bez roditeljskog staranja, djecu sa invaliditetom, djecu roditelja koji nemaju primanja po bilo kom osnovu i djecu roditelja čiji mjesečni prihod po članu domaćinstva po svim osnovama ne prelazi iznos od 50% prosječne netto plate ostvarene u prethodnoj godini na području FBiH, a prema zvaničnim podacima Federalnog zavoda za statistiku. Za djecu sa invaliditetom predlaže se priznavanje prava na finansiranje troškova prevoza bez obzira na udaljenost od mjesta prebivališta do mjesta sjedišta škole.

Na predloženi način osigurava se finansiranje troškova prevoza za sve učenike za koje postoji potreba za finansiranjem troškova prijevoza.

III FINANSIJSKA SREDSTVA

U Budžetu za 2023. godinu planirana su sredstva u iznosu od 100.000,00 KM za troškove prevoza učenika. Prema podacima o realizaciji finansijskih sredstava troškovi prevoza učenika u 2020. godini iznosili su 54.526,40 KM, u 2021. 71.05,00 KM, te u 2022. 90.370,00 KM.

Uzimajući u obzir podatke srednjih škola o broju učenika srednjih škola koji koriste usluge prevoza u 2022./2023. godini i cijenu prosječne mjesečne autobusne karte koja iznosi cca 90 KM., za troškove prevoza učenika u Budžetu Grada Bihaca za 2023. godinu potrebno planirati dodatna finansijska sredstva u iznosu od cca 100.000 KM dok je za 2024. godinu, potrebno je planirati cca 300.000 KM za ove namjene.

S obzirom na navedene razloge, predlažem Gradskom vijeću da predloženi Nacrt Odluke o finansiranju troškova prevoza učenika srednjih škola prihvati i uputi na javnu raspravu.

Prilog: Nacrt Odluke

GRADONAČELNIK

Elvedin Sedić

NACRT

Na osnovu člana 12. stav (3) tačka 1) Zakona o lokalnoj samoupravi Unsko-sanskog kantona („Službeni glasnik Unsko-sanskog kantona“ broj 8/11), člana 35. tačka c) i člana 35. tačka jj) Statuta Grada Bihaća („Sužbeni glasnik Grada Bihaća“ broj 13/15, 13/18 i 12/22), Gradsko vijeće Grada Bihaća na ____ . sjednici održanoj dana, _____ 2023. godine, donijelo je:

ODLUKU O FINANSIRANJU TROŠKOVA PREVOZA UČENIKA SREDNJIH ŠKOLA

DIO PRVI-OPĆE ODREDBE

Član 1. (Predmet)

Ovom Odlukom utvrđuju se korisnici prava na finansiranje troškova javnog prevoza redovnih učenika srednjih škola za školsku 2023.-2024., sticanje i prestanak prava na finansiranje troškova prevoza učenika srednjih škola, nadležnost i postupak za priznavanje i prestanak prava na finansiranje troškova prevoza učenika srednjih škola, način finansiranja troškova prevoza i druga pitanja od značaja za finansiranje troškova prevoza učenika srednjih škola.

Član 2. (Korisnici)

- (1) Pravo na finansiranje troškova prevoza imaju redovni učenici srednjih škola sa prebivalištem u Bihaću koji pohađaju srednju školu na području grada Bihaća, čija je udaljenost od mjesta prebivališta do škole najmanje 5 (pet) kilometara, a pripadaju jednoj od sljedećih kategorija:
 - a) djeca bez roditeljskog staranja,
 - b) djeca sa invaliditetom,
 - c) djeca roditelja koji nemaju primanja po bilo kom osnovu,
 - d) djeca roditelja čiji mjesečni prihod po članu domaćinstva po svim osnovama ne prelazi iznos od 50% prosječne netto plate ostvarene u prethodnoj godini na području FBiH, a prema zvaničnim podacima Federalnog zavoda za statistiku,
- (2) Djeca sa invaliditetom imaju pravo na finansiranje troškova prevoza bez obzira na udaljenost od mjesta prebivališta do mjesta sjedišta škole.

DIO DRUGI- STICANJE I PRESTANAK PRAVA NA FINANSIRANJE

Član 3.

(Podnošenje zahtjeva)

(1) Postupak za ostvarivanje prava na finansiranje troškova prevoza učenika srednjih škola iz člana 2. ove Odluke pokreće se podnošenjem zahtjeva.

(2) Uz zahtjev, podnosilac je dužan priložiti sljedeću dokumentaciju:

- a) Izvod iz matične knjige rođenih,
-) Kućnu listu,
- a) Uvjerenje Kantonalnog ministarstva unutrašnjih poslova-Odsjek za administraciju o prebivalištu na području grada Bihaća (PBA-1 obrazac),
- b) Uvjerenje o pohađanju srednje škole,
- c) Bankovni račun,
- d) Potvrdu prevoznika o cijeni mjesečne karte,
- e) Potvrdu o nezaposlenosti roditelja (za nezaposlene),
- f) Potvrdu poslodavca o radnom odnosu i visini primanja (za zaposlene),
- g) Ček od penzije (za penzionere),
- h) Drugi dokument kojim se dokazuje visina primanja u domaćinstvu,
- i) Ovjereni izjava oba roditelja da nemaju druga primanja po bilo kom osnovu izuzev onih koja su navedena u zahtjevu,
- j) Dokaz o invalidnosti, odnosno rješenje nadležnog organa ili komisije, po propisima iz penzijskog i invalidskog osiguranja F BiH, kojim je utvrđena invalidnost (za djecu sa invaliditetom).

(3) Obrasci zahtjeva i izjava se mogu dobiti u JU“ Centar za socijalni rad“ Bihać, u Centru za pružanje usluga Grada Bihaća i matičnim uredima.

Član 4. (Prestanak prava)

Pravo na finansiranje troškova prevoza učenika srednjih škola prestaje:

- a) kad učenik izgubi status redovnog učenika srednje škole,
- b) kad učenik promijeni porodični status, odnosno promijeni se socijalni i materijalni status porodice učenika,
- c) kad učenik iz bilo kojih razloga prestane koristiti usluge finansiranja prevoza,
- d) kad nastupe okolnosti od uticaja za prestanak prava na finansiranje.

DIO TREĆI -NADLEŽNOST I POSTUPAK ZA PRIZNAVANJE PRAVA

Član 5. (Nadležnost)

O pravu na finansiranje troškova prevoza učenika srednjih škola i prestanku tog prava, a po zahtjevu jednog od roditelja odnosno staratelja djeteta, ili po službenoj dužnosti u prvom stepenu odlučuje JU“ Centar za socijalni rad“ Bihać.

Član 6. (Postupak)

(1) Zahtjev za ostvarivanje prava na finansiranje troškova prevoza sa dokumentacijom navedenom u članu 3. ove Odluke, podnosi se JU „Centar za socijalni rad“ Bihać koji, nakon utvrđivanja formalnih i materijalnih uslova, donosi Rješenje o ostvarivanju prava na finansiranje troškova prevoza.

(2) Rješenje iz stava (1) ovog člana JU „Centar za socijalni rad“ Bihać je dužna donijeti u roku od 30 dana od dana prijema zahtjeva i primjerak istog dostaviti Službi za opću upravu i društvene djelatnosti.

(3) U postupku za priznavanje i prestanak prava na finansiranje troškova prevoza učenika srednjih škola, primjenjuju se odredbe Zakona o upravnom postupku.

(4) Korisnik prava na finansiranje dužan je organu koji je u prvom stepenu odlučivao o pravu na finansiranje, prijaviti svaku promjenu koja je od uticaja za ostvarivanje, obim ili prestanak prava, u roku od 15 dana od dana nastanka promjene.

Član 7. (Žalba)

(1) Protiv prvostepenog rješenja o priznavanju, odnosno prestanku prava na finansiranje troškova prevoza može se podnijeti žalba.

(2) Žalba se podnosi Komisiji za žalbe Gradskog vijeća Bihać u roku od 15 dana od dana dostavljanja rješenja, a predaje se neposredno ili šalje poštom organu koji je donio prvostepeno rješenje.

DIO ČETVRTI- NAČIN FINANSIRANJA TROŠKOVA PREVOZA

Član 8. (Mjesečna karta)

(1) Troškovi prevoza učenika srednjih škola, finansiraju se iz Budžeta Grada Bihaća.

(2) Osnovicu za izračunavanje učešća Budžeta Grada Bihaća u finansiranju troškova prevoza učenika srednjih škola, predstavlja cijena mjesečne karte.

(3) Kopije mjesečnih karata ili potvrdu prevoznika učenici su dužni dostaviti u JU „Centar za socijalni rad“ Bihać, radi provođenja kontrole utroška doznačenih sredstava.

Član 9. (Doznačavanje sredstava)

(1) Služba nadležna za finansije će nakon podnešenog zahtjeva za doznačena sredstva od strane JU „Centar za socijalni rad“ Bihać, doznačiti utvrđeni mjesečni iznos JU „Centar za socijalni rad“ Bihać.

(2) JU „Centar za socijalni rad“, Bihać će doznačena sredstva uplatiti na bankovni račun učenika ili bankovni račun jednog od roditelja, odnosno staratelja do 30-tog u mjesecu za naredni mjesec, ukoliko su opravdali sredstva za predhodni mjesec.

Član 10.
(Obezbjeđivanje sredstva)

(1) Sredstva za realizaciju ove Odluke obezbijedit će se u Budžetu Grada Bihaća za 2024. godinu.

(2) Grad Bihać može privremeno ili trajno prekinuti finansiranje troškova prevoza učenika, ukoliko dođe do znatnog smanjenja prihoda zbog objektivnih okolnosti na koje Grad Bihać nije mogao uticati.

DIO PETI- NADZOR I PRAĆENJE

Član 11.
(Nadzor)

Nadzor nad provođenjem odredaba ove Odluke vrši Služba za opću upravu i društvene djelatnosti, JU „Centar za socijalni rad“ Bihać i Služba za finansije, svako u okviru svoje nadležnosti.

Član 12.
(Praćenje namjenskog utroška)

Grad Bihać zadržava pravo praćenja utroška sredstava doznačenih JU „Centar za socijalni rad“ Bihać, te preispitivanja namjenskog utroška doznačenih sredstava.

DIO ŠESTI- PRELAZNE I ZAVRŠNE ODREDBE

Član 13.
(Produženje prava)

Korisniku prava na finansiranje koji je u 2023. godini ispunjavao uvjete navedene u Odluci o finansiranju troškova prevoza učenika srednjih škola u Gradu Bihaću za 2023. godinu, pravo na finansiranje troškova prevoza će se produžiti bez ponovnog provođenja postupka, a na osnovu potvrde o pohađanju srednje škole u školskoj 2023/24. godini.

Član 14.
(Stupanje na snagu)

Ova Odluka stupa na snagu osmog dana od dana objavljivanja u Službenom glasniku Grada Bihaća.

Stupanjem na snagu ove odluke prestaje da važi Odluka o finansiranju troškova prevoza učenika srednjih škola u Gradu Bihaću za 2023.

Gradsko vijeće
Broj: _____
Bihać, _____.2023.

Predsjedavajući Gradskog vijeća
Zulfikar Handukić